

पंचपरगनिया संज्ञा का परिचय

पंचपरगनिया संज्ञा केर चिन्हाप

संज्ञा की परिभाषा

जन सब्द' टाले कन' चिज चाहे जिनिस, जाएगा, भाअ एमाइनेक नाम केर ब'ध हएला अके संज्ञा कहल जाएला । एआनि संज्ञा असन बिकारी सब्द' के कहल जाएला जेटा कन' बिसेस जिव, जिनिस, भाअ आर कन' खास जाति चाहे जिव केर चिन्हाप कराएला ।

पंचपरगनिया भाषा के विद्वानों के अनुसार संज्ञा

पंचपरगनियाँ संज्ञा केर भेद लेकहन बिदुआन एकमत नेखएँ, केउ दुइ त' केउ तिन त' केउ हिंदीक रकम पाँचटा कइ आहएँ ।

प्रो. परमानंद महतो जी के अनुसार पंचपरगनिया संज्ञा के भेद

प्रो. परमानंद महतो जि पंचपरगनियाँ संज्ञा केर तिनटा भेद केर चरचा कइर आहएँ - १. जातिबाचक २. बेकूतिबाचक ३. भाअ बाचक । इमन समुह बाचक के जातिबाचक आर बेकूतिबाचक केर भितरेइ राइख आहएँ । आर दर'इब बाचक के जाति बाचक केर भितरे ।

डॉ. चन्द्र मोहन महतो जी के अनुसार पंचपरगनिया संज्ञा के भेद

हुंआँइ डॉ. चन्द्र मोहन महतो जि संज्ञा के दुइ भागे (धर'ने) बाँटि आहएँ - १. जीबा आर २. अजीबा ।

१. जीबा - जीबा माने जीबधारी । एआनि जीबा केर भितरे असन जीबधारी नाम गिला के राखल जाए आहे जेगिला चले पारे, कहे पारे आर सउब किछु करउ पारे, निमुद - पकामाकड़, चरइचुनगुनी, मानुस, बेटा, बेटी, नर, नारी, बाघ, सिआड़, छागेइर एमाइन ।

२. अजीबा - अजीबा माने जेकर जीउ नेखे । एआनि अजीबा नाम उ जिनिस केर नाम के कहल जाएला, जेगिला ना चले पारएँ, ना कहे पारएँ, आर ना किछु करे पारएँ । निमुद - बही, किताब,

कांथा, लुगा, ग'हम, एमाइन । (इमन केर अनुजाइ गाछ, पात, घांस एमाइन के अजीबा माहनेइ राखल जाए आहे)

डॉ. करम चंद्र अहीर जी के अनुसार पंचपरगनिया संज्ञा के भेद

हुंआँइ डॉ. करम चंद्र अहीर जी संज्ञा केर पाँच भेद कइर आहएँ जेगिला इ रकम आहे -

१. जातिबाचक संज्ञा - ज'न सब्द' लेक कन' जिनिस् चाहे जीब केर जानकारी पाउआएला उटाके जातिबाचक संज्ञा कहल जाएला । जेसन - कुकुर, गउ (माँ), छुआ, गाछ, पाहाड़, नदि, मानुस (ल'ग) घर, पंडकी, च'रइ, भाइ, बहिन, गाइ, गरू, भालु, बिलाइ एमाइन ।

२. बेकूतिबाचक संज्ञा - ज'न सब्द' ले कन' एकटा (बिसेस) ल'ग, जिनिस्, चाहे जाएगा एमाइन केर ब'ध हएला, उटाके बेकूतिबाचक संज्ञा कहल जाएला । जेसन - राम, गीता, राहु, कांची, राँची, कंच', सिबनाबाबा, ककर', माघ, फागुन, जितुआ, बुंदु, राहे, तमाइ एमाइन ।

३. समुहबाचक संज्ञा - ज'न सब्द' लेक कन' जिनिसेक हुंड़ा (इकट्ठा), ल'ग केर भीड़, कुधा (एकत्रित), चाहे जामा हल केर पाछनान (जानकारी) मिलेला उटा के समुहबाचक संज्ञा कहल जाएला । जेसन - बाजार, भीड़, मेला, हाट, झंपा, माछेइर/साग/मरचि/पेआज/रसुन एमाइन केर खेजा, जुलुस, झुंड, दल, बरग' सेना, मिटिंग एमाइन ।

४. दर'इब बाचक संज्ञा - दर'इब केर माने ह'एला कन' जिनिस् । एआनि जन संज्ञा ले कन' चीज चाहे बसतु केर बारे चिन्हाप (पाछनान) मिलेला उटाके दर'इब बाचक संज्ञा कहल जाएला । जेसन - घिउ, दुध, स'ना, रूपा, नुन, मरची, ग'बर, सुइ, सुता, ड'ट (कलम), किताब, क'पी, सिल'इट, थ'इला, ल'टा, छिपि एमाइन ।

५. भाअबाचक संज्ञा - ज'न सब्द' ले कन' ल'ग चाहे जिनिस् केर गुन केर पाछनान (जानकारी/चिन्हाप) मिलेला उटाके भाअ/भाव बाचक संज्ञा कहल जाएला । जेसन - पिआस, भुख, नींद, र'ग, निमन (सुइध), नाभान, उठान, अकबकी, दुलार, चिकन, चालाक, सुंदर, बुढ़ारी, फुरती, फुटानी, सेंखी, द'एआ, चेंका, तिता, गुरूआ, नुनछिआ, दुखान, जलन, जुआन, फेदान (सुसति), संगी, सतरू एमाइन ।

बिसेस काथा -

कुछ बिदुआन केर मत हेके कि संइगा केर समुह बाचक आर दर'इब बाचक केर अलग से भेद करेक दरकार नेखे । बासतब काथा एहे टाइ हेके कि इ दुइअ संइगा के जातिबाचक चाहे संइगाक अनुजाइ बेकृतिबाचक मेंहनेइ राखल जाना चाहि ।

Onlineppg.com

Onlineppg.com